



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : f Tir Yimiyim

Instagram tiryimiyim@aolima

YouTube tir yimiyim TAPAK 8

Russia-i ano February 24 nü amaktsü sentong yanglur: Oleksii Reznikov

Zagreb Open: Aman Sehrawat-i bronze medal angu



VOL. XX NO. 112 (ADOK 112) DIMAPUR ROGONÜ (FRIDAY) TSÜKLAI (FEBRUARY) 03, 2023 ₹ 5.00

NLA election atema tang tashi nomination kata mali

Dimapur, Tsüklai/February 02 (TYO): Office of the Chief Electoral Officer ajanga sangdong ka nung ashiba agi, aruya aliba Nagaland Legislative Assembly

election atema state nung Assembly Constituency 60 atema February 2, 2023 (tasemnü buba) tashinung Form-3A nung nomination kata agüja mali.

ENPO pangzüng nung Chang Tribal Council nokdaka lir

Dimapur, Tsüklai/February 02 (TYO): CKT, CTS aser CWS lungjemer 21/01/23 nü pangzüng renema aliba nung ajemdaker aruya aliba 14th Nagaland Legislative Assembly elections 2023 nung shilem magitsü ta ENPO ajanga August 26, 2022 nü pangzüng renema aliba nung CKS akang-akanga nokdaka lir, ta Chang Tribal Council (Chang Khulei Setshang) sangdong ka ajanga ashi.

Anungji aruya aliba election nung tokteptsü bilema aliba candidate tem Chang jurisdiction telungzük nung nomination magütsütsü tenokdangba agütsü. Iba sangdong nung aibelener nem tapet temerenshi agütsütsü, ta sangdong ajanga ashi.

Government of India ajanga Eastern Naga nung atema tangatetep kati maru tashi iba sangdong amshitsü, ta CKT sangdong ajangasa ashi.

NDPP-BJP sorkar ya ochimashi agi sünga lir: Congress

Dimapur, Tsüklai/February 02 (TYO): NDPP aser BJP lungjemer kumtetba Neiphui Rio sorkari nübur meyong sen akumtsüboa mamshi aser tetsübo makai ochimashi mapa inyaka arur, aser yamaji BJP alliance indang 'double engine' sorkari inyaka arur. Centre nung aliba BJP sorkari Neiphui Rio sorkar dang maki ochimashi mapa inyaktü ajungshia liasü, ta Sujata Paul, AICC Media Coordinator aser Temjenyanger Longkumer, PPC Secretary & Spokesperson, NPCC nati sangdong ka nung ashi.

anisang CM Neiphui Rio-i pa dang shingai masüngdangtsü ta mebilemtsüla. Naga nung tenung nung Congress party-i asüngdang. Item sen ya MLA indang jurila account nungi aruba masü. Ibai nübur meyong sen lir aser iba atema nübur temeden magütsütsü, ta sangdong ajanga ashi.

CM Neiphui Rio ya Nagaland indang Chief Minister tem rongnung ochimashi mapa inyaker tematiba ta kuli sayur aser pai nübur dang rateta ashitsü jenti lir. Forest Department meyong sorkar li nung komaser iba Complex ya yanglu aji pai rasaa ashitsüla.

Iba ki ya tereprangtsü nung shisa taor lir aser ibai nübur sen amajok nung indokba lir. Kechiba state senbong nungi iba sen indoka khuret tali agütsür? Nagaland nung aliba nüburtemi sorkar ka shim aser ochishia inyaktü imla liasü saka metemsüba sorkar ka kisüng masü saka Nagaland nung aliba nüburtem ajungtsü asoshi lemzükbä sen mashi lenmang nung amshiba yimya amshir, ta ashi.

Iba ki ya tamale renemer asünungbo, kechiba tanü tashi revenue generation malir? Iba ki ya jurila shiba nem agütsü mesüra sorkari shiba nem agütsütsü tebilemba lir? Jurila meyong masünungbo kechiba aremadoka aliba ki ya nüburtemi aginüba ama tajung asoshi kechiba mamshir? ta asüngdang.

Mapa mangur tali akumba mechi Nagaland nung lanurtem timtema lir, anungji kechiba lanurtem mesüra danga entrepreneurs nem tashi mesüra employment agütsütsü asoshi sentong meyanglur? Kechiba iba tesem ya Start Ups atema, Self Help Groups aser dangar office ama mamshir? ta tenati sangdong nung asüngdanga liasü.

Tatishitsü agi, Forest Colony, Dimapur nung mamshi aliba shopping complex aser parking plaza ya ka lir. RTI ajanga osang anguba nung, state planning board pur senden ka Chief Minister indang office nung June 9, 2011 nü amendang iba ki tulu ya yanglutsü lemtet, koba dang parnoki shopping complex ta ajar. Iba ki-o-jen yanglutsü atema sen ya Ministry of Urban Development aser HUDCO nungi aru aser ibai akmesen melie yimjak nung nübur mashileni aniba lir. Iba ki-o-jen yangluba nung sen crore 43 indok ta ashir, ta sangdong ajanga ashi.

State Planning and Coordination Department/State Planning Board ajanga iba ki arem nung Urban Ministry ajanga sen agütsür yanglutsü asatet. Iba ki ya Forest Department meyong asünungbo, ibai Rio sorkari tasü ita inyakba ochimashi mapa ka lir. Kodang nungi Forest Departments mesüra Ministries ajanga shopping complex tem ketdang süa aru aji CM Rio aser BJP-i langzütüla. Alima nung kecha nunga yamai mataloker, anungji iba ki-o-jen ya juri meyong atema yanglu ta ajitetet, ta tenati ashi.

Anungji juri ji shiba. Opposition maliba sorkar ka

NDPP-BJP candidate sangdongogo; tang temendak MLA 16 maden

Kohima, Tsüklai/February 02 (TYO): Nagaland Assembly elections February 27, 2023 nü agütsü asoshi nominations agütsütsü anogo pungo lia tang yimsü tesüdak aser pre-poll alliance, Nationalist Democratic Progressive Party (NDPP) aser BJP nato Brehostibarnü candidate tem tenung sangdongogo.

NDPP aser BJP ya state election magidang menden 40:20 lemsar tokteptsü renema lir.

NDPP nungi tetsüti tem rongnung Northern Angami-II Assembly Constituency atema pezüben Chief Minister inyaka arusang Neiphui Rio, taoba chief minister T R Zeliang Peren menden, Minister aser trokben MLA G Kaito Aye - Satakha A/C, taoba Rajya Sabha MP K G Kenye - Chizami A/C, Tehok A/C atema C L John aser Noksen A/C atema H Chuba Chang nungertem lir.

2018 elections nung menden 18 ngutetba NDPP yagi bye-election asem nung takok ngua menden 21 akum aser taoba küm April ita Naga Peoples' Front (NPF) nungi MLA 21 zükloka parnok 42 akum.

Ajisüaka menden lemsaba nung ajemdaker NDPP ya tang temendak legislator ana den pilaba kisüng masü saka MLA 13 nem ticket magütsü, anungji tang MLA teinyakdak 15 teka tazüng yutsür.

Tan election nung NDPP-i tang temendak MLA tem yutsür tetsür candidate ana nem ticket agütsü aser tenaji Chümoukedima district nung Dimapur-III menden asoshi YouthNet indang Director, Hekani Jakhalu aser Kohima district nung Western Angami-I menden atema taoba Angami Women Organisation tir Salhoutuonuo Kruse alitsü.

Iba constituency ana nungya tang temendak MLA anaji Azheto Zhimomi aser Keneizhakho Nakhro alitsü. Tenati taoba election nung NPF ticket nungi takok angus aka 2022 küm April ita NDPP den loktep.

NPF MLA tem NDPP nung aden saka ticket matartemji Wakching A/C nungi Minister Y M Yollow, Tuensang Sadar-I A/C nungi Toyang Changkok Chang, Longkhim-Chare A/C nungi Muthingnyuba, Chozuba A/C nungi Dr Chotish Sazo, Meluri A/C nungi Yitachu, Tuli A/C nungi Amenba Yaden, Wokha

A/C nungi Dr Chumben Murry, Atoizu A/C nungi Picto Shohe, Mon Town A/C nungi N Thongwang Konyak aser Tuensang Sadar-II A/C nungi Kejong Chang alitsü.

Tang temendak MLA L. Khumo, shiba taoba election nung National People's Party (NPP) ticket nungi takok angu saka NDPP den loktep, pa nema ticket magütsü.

Tanüngba NDPP candidate temji Moatoshi Longkumer - Dimapur-II A/C, Zhaleo Rio - Ghaspani-II A/C, Tarie Zeliang - Tening A/C, Dr. Neikiesalie Nicky Kire - Kohima Town A/C, Dr. Kekhrielhoulie Yhome - Northern Angami-I A/C, R. Khing - Tseminyu A/C, Y Vikheho Swu - Pughoboto A/C, Medo Yhokha - Southern Angami-I, Neiba Kronu - Pfutsero A/C, Kudecho Khamo - Chozuba A/C, Kupota Khesoh - Phek A/C, Z. Nyusietho Nyuthe - Meluri A/C, Imnatiba - Arkakong A/C, T. N. Manen - Impur Tongpang Ozukum - Angetyongpang A/C, Imkongmar - Mongoya A/C, Sharingain Longkumer Aonglenden A/C, Metsubo Jamir - Mokokchung Town A/C, Temjenmenba - Jangpetkong A/C, Pukhayi Sumi - Aghunato A/C, K. T. Sukhalu - Zunheboto A/C, G. Kaito Aye - Satakha A/C, Mhathung Yanthan - Sanis A/C, W. Chingang Konyak - Wakching A/C, Noke Wangnao - Tapi A/C, Eshak Konyak - Aboi A/C, E. E Pangteang - Moka A/C, B. S. Nganlang Phom - Tamlu A/C, H. Chuba Chang - Noksen A/C, K. Odibendang Chang - Tuensang Sadar-II, N. Bongkhao Konyak - Tobu A/C, S. Heno Khiamniungan - Thonoknyu A/C, S. Keoshu Yimchunger - Shamator-Chessore A/C aser Khalemew Yimchunger - Pungro-Kiphire A/C alitsü.

NDPP legislator ana nem ticket magütsürji Tenning A/C nungi Namri Nchang aser Southern Angami-II menden nungi Zale Neikha alitsü. Namri Nchang ya Tarie Zeliang-i melen, shiba taoba mapang NPF legislator liasü aser Neikha indang menden ya menden lemsaba nung ajemdaker BJP nungi Kropol Vitsu nem agütsü.

Ano külem BJP nungia tang temendak MLA 12 nungi 11 nem party ticket agütsüogo aser item

rongnung Wokha district nung Tyui A/C atema Deputy Chief Minister Y Patton, Mokokchung district kübok Alongtaki atema State BJP tir Temjen Imna Along aser Wokha district nung Bhandari A/C atema BJP indang national spokesperson aser tang temendak MLA Mmhonlumo Kikon alitsü.

Pezüben MLA inyaksang Imkong L. Imchen shiba April ita NPF yutsür NDPP nung aden saka ano BJP dangi meyip, pa Mokokchung district kübok Koridang A/C nungi tokteptsü ticket agütsü.

BJP legislator ka kisüng nem ticket magütsübaji Dr Longrineken lir aser pa menden ya NDPP nem agütsü.

Menden lemsatepba nung BJP-i NDPP den menden trok melentep aser yangji state yimtiba, Kohima nung Southern Angami-II A/C dena lir.

BJP nungi tetsür ka dang lir aser laji Kahuli Sema, shiba tawa ang Public Works Department, Government of Nagaland indang Engineer-in-Chief ama mapa nungi anisüngzüka liasü. La ya Zunheboto district nung Atoizu A/C nungi tokteptsü.

Tanüngba BJP candidate temji Minister N. Jacob Zhimomi - Ghaspani-I, Renponthung Ezung - Wokha Town A/C, Panjung Jamir - Tuli A/C, Kazheto Kinimi - Akuluto A/C, H. Khehovi Yephomi - Suruhoto A/C, Tovihoto - Dimapur-I, Seyithrongba Sangtam - Longkhim Chare A/C, P. Bashangmongba Chang - Tuensang Sadar-I, Er. Cheong - Mon, Minister P. Paiwang Konyak - Tizit A/C, taoba mapang minister inyaka alisang Konngam Konyak - Phomching A/C, Minister S Phangnyu Phom - Longleng, H. Haiying - Noklak aser Minister Kashiho Sangtam - Seyochung Sitimi alitsü.

Ajisüaka Naga Peoples' Front (NPF) aser Congress densema political party tulu tem nungi candidate sangdonga mali.

JD(U) ajanga candidate ana sangdongogo aser tenaji Tyui A/C atema state unit tir NSN Lotha aser Ghaspani-II menden atema general secretary Kitoho S. Rotokha alitsü.

Lok Janshakti Party (Ram Vilash) nungi Zunheboto A/C atema Ghovishe Kiba candidature sangdongogo.

Eastern Nagaland atema Centre-i Autonomous Council agütsür

Kohima, Tsüklai/February 02 (TYO): Nagaland anüdoklen district tem nung Autonomous Council tentettsü asoshi central sorkari maongka agütsü.

Osang ajanga ashiba agi, Eastern Nagaland People's Organisation (ENPO) den ananü ken o jembiba tembangba sülen central sorkari iba maongka ya agütsü.

ENPO ya Nagaland nung district trok - Mon, Tuensang,

Kiphire, Longleng, Noklak aser Shamator nungi Naga kin tenet ajanga tentetba lir.

Bensa amshir ta aija 2010 küm nungi ENPO ajanga "Frontier Nagaland" khanga arua liasü.

Lokti tentet balalai Nagaland assembly elections nung shilem magütsü ta amokmerenba mapang ENPO aser central government committee tsüngta tongtipang ken o ya jembia liasü.

ENPO aliba Nagaland nung

district trok nungi NLA nung menden 20 lir.

Nagaland anüdoklen district tem nung autonomous council tentettsü asoshi maongka agütsüba sülen ENPO ya election nung shilem magütsü ta nokdakba lepa repringshitsü lir, ta osang angazüker.

Züngsem 60 aliba Nagaland assembly atema election ya February 27 nü agütsü aser vote ya March 2 nü azüngtsü.



14th Nagaland Legislative Assembly 2023, General election atema Mayangnokcha Govt. Higher Secondary School, Mokokchung nung February 2 nü training mezüngbuba round agiba mapang Deputy Commissioner & District Election Officer, Mokokchung, Shashank Pratap Singh, IAS-i Polling Personnel (Presiding Officers, Polling Officer-1, 2 aser 3, Male & Female) tem nem tetuyuba balala agütsüba noksa nung angur.

Mkg District kübok RO temi Form-1 indang osang metetdaksü

Dimapur, Tsüklai/February 2 (TYO): Mokokchung District kübok Returning Officers (ROs) temi 14th Nagaland Legislative Assembly (NLA) election atema Form-1 dak sendakba ken o tem metetdaksüogo.

RO temisa, nomination paper tem, candidate tem mesüra pa/lai shimmer yokba nisung kati February 7 (nomination papers benoktsü atema tatembangbuba anogo) nü tashi nung anepdang 11:00 ako nungi nikongtsütsü 3:00 ako tashi nung ROs mesüra ARO tem nem agütsütettsü, ta metetdaksü.

Form meshitsü aser benoktsü atema address tem yamai alitsü: 21 Tuli A/C, ADC & RO, Shaying Sheu or EAC & ARO,

M. Khenpa, 22 Arkakong A/C, SDO (C) & RO, Rorheu Peseie or ARO, Mechietsho Koza, 23 Impur A/C, ADC & RO, Chumlamo Humtsoe or EAC & ARO, Seyievillie Pfkuri, 24 Angetyongpang A/C, ADC & RO, Chumlamo Humtsoe or SDO (C) ARO, Kikato K. Chishi, 25 Mongoya A/C, SDO (C) & RO Longdiba L. Sangtam or EAC & ARO Vitolu, 26 Aonglenden A/C, SDO (C) & RO, Longdiba L. Sangtam or EAC & ARO Abeinuo Jasmine Ashao, 27 Mokokchung A/C, SDO (C) & RO, Shelly Katiry or EAC & ARO, Aloto H Shohe, 28 Koridang A/C, SDO (C) & RO, Shelly Katiry or EAC & ARO, Kelengunuo Solo, 29 Jangpetkong A/C, SDO (C)

&RO, Hotolu Sema or BM & ARO, Yanithung N Ngullie, 30 Alongtaki A/C, ADC & RO, T. Lankonsen Tsanglao or EAC & ARO, N. Orenthung Kikon.

Nomination paper tem ya February 8 nü 11:00 ako nung scrutiny atema RO tem indang office Chamber-i bener aotsü. Maneni Ro temisa, candidature agütsü atema osang ya candidate-i mesüra pa/lai shimba nisung ka mesüra pa/la election agent-i candidate-i tezüluba nung temelaba agütsüba shiti bener arua February 10 nü 3:00 ako tashi nungbo ketdangsurtem (RO/ARO) nem agütsüsüla ta metetdaksü.

Nagaland nung election ya February 27 nü anepdang 7:00 ako nungi nikongtsütsü 4:00 ako tashi agütsü.

&RO, Hotolu Sema or BM & ARO, Yanithung N Ngullie, 30 Alongtaki A/C, ADC & RO, T. Lankonsen Tsanglao or EAC & ARO, N. Orenthung Kikon.

Nomination paper tem ya February 8 nü 11:00 ako nung scrutiny atema RO tem indang office Chamber-i bener aotsü.

Maneni Ro temisa, candidature agütsü atema osang ya candidate-i mesüra pa/lai shimba nisung ka mesüra pa/la election agent-i candidate-i tezüluba nung temelaba agütsüba shiti bener arua February 10 nü 3:00 ako tashi nungbo ketdangsurtem (RO/ARO) nem agütsüsüla ta metetdaksü.

Nagaland nung election ya February 27 nü anepdang 7:00 ako nungi nikongtsütsü 4:00 ako tashi agütsü.

Mokokchung DC & DEO-i metetdaksür

Dimapur, Tsüklai/February 2 (TYO): Deputy Commissioner & District Election Officer, Mokokchung, Shashank Pratap Singh, IAS-i, ROs, AROs Sector Officers, Deputy Commissioner office employees, ROs, Control Room, NIC all EEM team, Micro Observer, liaison officers, DLMTs, BLOs amala election inyakyim nung sendaka aliba ketdangsur shirnoksa parnok polling station adena orr mapa lemezükogo aser DEO Mokokchung-i election dak sendakba tanga mapa nonglokja

lir parnok dang DC & DEO Office Mokokchung nungi Form 12 agizüksü metetdaksüogo.

Paisa, iba form ya February 7 nü tashi nungbo benoktsüla ta metetdaksüogo. Commission-i agizüker aliba ama form 12 nung postal ballot atema apply asüba mapang EPIC copy ka mesüra teküboklen agüja aliba kuli kaket mashi ka agütsüsüla.

Kuli kakettem: 1. Aadhaar card 2. MNREGA card 3. Bank/post office-i issue asüba Passbooks den noksa. 4. Ministry of Labour indang scheme kübok

agütsüba Health insurance smart card. 5. Driving license. 6. PAN card. 7. NPR kübok RGI-i agütsüba Smart card. 8. Indian passport. 9. Pension document den photograph. 10. Central/state/Govt./PSU/public limited companies employees tem nemagütsüba service identity cards den noksa, 11. MPs/MLAs/MLCs-i agütsüba official identity cards 12. Unique Disability ID (UDID) card, M/O Social Justice & empowerment, Government of India.

Nagaland Conservatory of Music-i Bharat Parv 2023 nung shilem agi



Dimapur, Tsüklai/February 2 (TYO): Nagaland Conservatory of Music-i January 30 nü New Delhi kübok Red Fort Lawns nung Bharat Parv 2023 sentong nung shilem agiogo.

Iba sentong nung Nagaland Conservatory of Music-i, Naga

nungeri mejemba ken, Indian patriotic songs, bollywood ken aser western kentem balala dena liasü, koba sentepa aliba lokti-i kanga pelashishia agizüka liasü. Choir ya Hito Kiho-i conduct süa liasü.

Bharat Parv sentong ya

Republic Day amungba nung shilem ka ama Ministry of Culture and Ministry of Tourism Government of India-i ayongzük, aser taküm iba sentong indang omenji "The incredible festivals of India" liasü.

Mkg DC & ARO-i Prayer Rally indang metetdaksü

Dimapur, Tsüklai/February 2 (TYO): Deputy Commissioner & District Election Officer Mokokchung, Shashank Pratap Singh, IAS-i sangdong ka ajanga, taruba 14buba Nagaland Legislative Assembly election dak sendakba nung Ao Baptist Pastor Fellowship Mokokchung aser District Administration & District Election Officer Mokokchung longjemer "Systematic Voters Education & Electoral

Participation (SVEEP)" kübok "Clean Election Prayer Rally" ka February 7 nü agütsü, ta metetdaksüogo.

Iba sarasadem sentong ya anepdang 8:00 ako nung Local Ground nung tenzüksü aser 11:00 ako nung Police Point Main Town Mokokchung nung tembangtsü.

Iba sentong nung nüburtem ajaki jangrabangra shilem agütsü atema DC-isa mepeshia metetdaksüogo.

Kohima nung Bicycle Rally ka ayongzüka agütsü

Dimapur, Tsüklai/February 2 (TYO): DC & DEO Kohima office-i ayongzüka Kohima district nung SVEEP Campaign kübok Bicycle Rally ka ayongzüka agütsü.

Iba Bicycle Rally ya February 4 anepdang 7:00 ako nung DC Office nungi tenzüka

Raj Bhavan tashi agütsü.

Deputy Commissioner Kohima, Shanavas C IAS-i iba rally tenzüksütsü aser CRC, Billy Graham Rd Pastor Khrieneiu Metha Peniel-i sarasademtsü. Temulunger ajak iba rally nung shilem agütsü atema pelashishia jaokogo.

Mokokchung Town Baptist Arogo-i teyari agütsü

Dimapur, Tsüklai/February 2 (TYO): TB agi shirangertem nem teyari agütsütsü aser lokti nung parnok sentokba angatetdaksütsü atema India sorkari Nikshay Mitra project amenokogo.

Iba project ajanga nüburtem nem TB agi shirangertem adopt süa parnok nungdakba chiyongtsü aser mozü tenüngdakbatem teyari agütsütsü atema maongka agütsür. Mokokchung District nung Nikshay Mitras 24 lir, kong kija, NGO, Corporates tem amala densema lir aser parnoki TB agi shiranger 97 adopt süa ita shia parnok nem nutritional

supplements tem agüja arudar. Shirangertem ya 50 bo Mokokchung Town Baptist Arogo-i adopt süa lir.

Arogo-i tejakdang ser tatishitsü tajung sayua, 2023 küm January 30 nü küm asem atema TB agi shiranger 50 adopt süogo. MTBA-i, Mokokchung nung Tuberculosis agi shiranger 50 nem küm asem atema ita shia parnoki nungdakba chiyongtsü agütsütsü nangzüka lokti ajangzükdaksütsü atema jenjang tajung agiba atema Department of Health and Family Welfare, Mokokchung-i kanga pelaba kasa sangdong ajanga lemsatapa liasü.

ATMA-i ayongzüka Longkong yimtsüng nung training agütsü



Dimapur, Tsüklai/February 2 (TYO): Agricultural Technology Management Agency (ATMA) Mokokchung, Chuchuyimlang Block-i ayongzüka Longkong yimtsüng nung January 30 aser 31 nü demonstration sentong ka agiogo.

Sentong nung shisalen sayur Abenla B Jamir, ATM-i, mersü lu ayimtsü atema alu renemba aser tsünüba yimya sayua liasü. Laisa, weed management, water management aser plant protection measures dak rangloker jembi. Laisa, nursery raised bed renemba aser anepaluba yimya sayua liasü. Seed tray amshia sapling tem tsünüba yimya dena aluyimertem

dang sayuogo.

Kasa mapang nung shisalen sayur Tangit Longkumer, ATM-i, mendi koda tsünütsü iba indang tangazükba agüja liasü. Paisa, pest control measures aser nutrient management practices indang lemsatapa liasü.

Shisalen sayursa Aolemla Kichu, BTM-i, okra tsünütsü atema alu renemba aser tsünüba yimya sayu. Laisa, okra tsünütsü atema ali nung moisture nungdaker aser iba den drainage facility tajung nungdaker ta ashi. Ajak senteper iba sentong nung aluyimer 15-i shilem agi aser parnok nem metsüjangnatsü, vermicompost amala lemja liasü.



OFFICE OF THE
BHARATIYA JANATA PARTY
Molungkimong Unit , Mangkolemba District Org.
P.O. Mangkolemba - 798604 : Nagaland

Ref. No. 09

Date 01/02/2023

SANGDONGER

30th Alongtaki AC nungi MLA aser BJP Nagaland State Tir Shri Temjen Imna Along-i BJP Molungkimong Unit senzuka yuja aru aser political mapa ajak Party den tangatettep makai inyaka aru. Anungji item kuli tem ajanga 30th Alongtaki AC kubok BJP Molungkimong Unit indang mendenpuri anir Executive ajaki molungtepa Party office dissolve asuba sangdonger.

NAME	Designation	Sign
1. Tsukjemwati	President	<i>[Signature]</i>
2. Imenukshi	Secretary	<i>[Signature]</i>
3. Imnatizuk	Treasurer	<i>[Signature]</i>
4. Tsukjemchiba	Executive	<i>[Signature]</i>
5. Nokinsangba	Executive	<i>[Signature]</i>
6. Taliangshi	Executive	<i>[Signature]</i>
7. Kitemmeren	Executive	<i>[Signature]</i>
8. Purnungsang	Executive	<i>[Signature]</i>
9. Jemtimenba	Executive	<i>[Signature]</i>
10. Pursusu	Executive	<i>[Signature]</i>
11. Chubameren	Executive	<i>[Signature]</i>
12. Takumpuba	Executive	<i>[Signature]</i>
13. Ponen	Executive	<i>[Signature]</i>
14. Imtijungshi	Executive	<i>[Signature]</i>

(TSUKJEMWATI)
President
BJP Molungkimong Unit
**President
Bharatiya Janata Party
Molungkimong Unit**

(IMENUKSHI)
Secretary
BJP Molungkimong Unit
**Secretary
Bharatiya Janata Party
Molungkimong Unit**



GOVERNMENT OF NAGALAND
DIRECTORATE OF SCHOOL EDUCATION

NAGALAND : KOHIMA

No. ED/ACCT/MONITORING-UID/2018-19

Dated: Kohima the 1st Feb' 2023

NOTIFICATION

UIDAI, Government of India has authorised the Department of School Education for Aadhaar enrolment of School Children at the block level for easy access of the facility by the community. All the Educational Block Research Centres (EBRCs) will be provided with Aadhaar Enrolment Kit for the convenience of the School Children. Currently, 19 (Nineteen) EBRCs are equipped with the Aadhaar Enrolment Kits, their details are as below :

S.No	Operator Name	Name of EBRC	District
1	L Langmai Konyak	EBRC-TOBU	Mon
2	Sunongthong Yimchunger	EBRC PUNGRO	Kiphire
3	Tolong W	EBRC-ABOI	Mon
4	Tingsane	EBRC-TENING	Peren
5	Heisaneule Insing	EBRC-PEREN	Peren
6	Vesakholu	EBRC-PHEK	Phek
7	L Asangba	EBRC-NOKSEN	Tuensang
8	Limongi Murry	EBRC-SANIS	Wokha
9	Tongching Sonla	EBRC-HAKUSHANG	Tuensang
10	Lhiko U Kapfo	EBRC-PFUTSERO	Phek
11	Anthony Ngouri	EBRC-MELURI	Phek
12	K Manlih Konyak	EBRC-MON	Mon
13	Vesanu	EBRC-CHOZUBA	Phek
14	Jangtinsat Khongsai	EBRC-ATHIBUNG	Peren
15	Kekhriethonuo Kire	EBRC- L. KHEL	Kohima
16	P Zhoto Naleo	EBRC-VISWEMA	Kohima
17	Alenuotsurho	EBRC-CHIEPHOZOU	Kohima
18	Rokoneinuo Rhatsu	EBRC-SECHU ZUBZA	Kohima
19	Mutile Kath	EBRC-TSEMINYU	Kohima

All the School authorities (both Government and Private) are requested to avail the facility and enrol all the School Children on priority. Remaining EBRCs will be deployed with Aadhaar Enrolment Kits very soon.

(THAVASEELAN K) IAS
Principal Director



January 02, 2023 nū New Delhi nung National Assembly of Zambia Speaker, Nelly Butete Kashumba Mutti leniba nung Zambia linük nungi tongti ketdangsertem telok kati Parliament nung Lok Sabha Speaker, Om Birla ajurudang tangokba noksa nung angur.

Opposition-i Parliament nung Adani Group atema o lemteptsü ahang

New Delhi, Tsüklai/ February 02 (Agencies): Singh nunger densema MP 9-i rule 267 kübok notice agütsü.

Brihostibarnü Opposition party agütsü. Parnoki tanga onüktem temi Adani group company tochtsür Adani group stocks nung ochimashi lir ta tai jenjang aser ibaji ajanga tonglokja aliba onük nung o lemteptsü aser iba ken o tilateri investors million aika bushisüngdangtsü atema kongshiba onük nung o Parliamentary joint committee lemteptsü takhangba agütsü. Iba ken o ajanga India ka nem agütsütsü takhangba nungertemi kanga meranga agütsü. aazükba sen aika takoksa

Opposition party temi item takhangba agütsüba ajanga Lok Sabha aser Rajya Sabha naprongla nung senden aiben thinena liasü.

Parliament House Raja Sabha Chairman, anaprongla nung Congress, Jagdeep Dhankhar-i item Shiv Sena, Left aser Aam notice ajakji magizük, Aadmi Party densema ibayongji opposition MP tem opposition party aika nungi kanga jashi pei mena alidak züngsemtemi US short seller, Hindenburg Research-i Adani tenzüka liasü.

group nem tai tonglochtsüba onük nung o lemteptsü takhangba agütsü, ajisüaka chairman-i magizük. Parnoki ahangba külemi iba ken o Chairman-i magizükba agi bushisüngdangtsü atema joint parnoki longkak aita yimyim parliamentary committee (JPC) nem agütsütsüla, ta ayim, aser ibaji ajanga nikongdang 2:00 ako tashi takhangba agütsü.

senden magiteti liasü. Adani group stocks jenjang aitba ajanga Chairman-i mejungu akümba ajanga Life Insurance Corporation (LIC) nikongdang 2:00 ako tashi aser public sector banks senden thinen.

indang investments jenjang Parliament House kima osangbenertem den jembidang mejungu akümtsüa akok. Congress lenir Kharge-i,

LIC-i Adani group stocks opposition party temi anogo nung sen aika invest süa lir. shia Joint Parliament Hindenburg Research indang Committee (JPC) nem osang agütsüdadksüner mesüra report ka ajanga Adani group Supreme Court-i ketdangtsüa iba company stocks nung ken o ochimashi lir, ta tai bushisüngdangdaksüner, tonglochtsüba sülen Adani kechiyong iba ken o ya nüburtem Group dollar sen billion 100 meyong sen dak sendakba onük dak tema takoksa nguogo. lir, ta metetdaksü.

Ajisüaka Adani group-ibo "Nüburtem atema bilema iba report ji tiyazü, ta ashir. onoki Adani Group dak

Lok Sabha nung oppostion sendakba ken o party balala nungi MP tem bushisüngdangtsü atema Joint sabangleni oa yimyim ayim Parliamentary Committee (JPC) nem agütsüdadksüner aser Adani group oshimashiba mesüra Supreme Court nem ken oji bushisüngdangtsüla, ta takhangba agütsü. ibaji ketdang südadksüner.

Lok Sabha Speaker, Om Parnoki anogo shia Birla-i züngsemtem dang, iba bushisüngdangba osang osangji tejangja masü, anungji agütsütsüla," ta paisa ashi.

tai metonglochtsütsüla aser Budget senden nung sorkar Question Hour ya kanga anema onük balala benoktsü tongtibang mapang ka lir, asoshi Brihostibarnep opposition anungji iba mapang nung party balala nungi lenirtem timtem magütsütsüla, ta ashi. adenshia asalentong yanglua

Ajisüaka opposition MP liasü. Iba senden nungji parnoki temi maneni yimyim ayima House anaprongla nung iba longkak aita ajanga Speaker- onük nung o lemteptsü aser iba i nikongdang 2:00 ako tashi ken o bushisüngdangtsü atema senden thinena liasü. JPC nem agütsütsü telemtetba

Rajya Sabha nunga kasa agia liasü. Iba senden nungji Congress, onük nung Opposition lenir aser Congress Tir, Mallikarjun DMK, TMC, SP, JD(U), Shiv Kharge, Shiv Sena MP Sena, CPI(M), CPI, NCP, Priyanka Chaturvedi aser IUML, NC, AAP aser Kerala Aam Aadmi Party MP, Sanjay Congress nungi lenirtem aden.



TIR YIMYIM

YIMOBILEM (EDITORIAL)

DIMAPUR ROGONÜ, TSÜKLAI(FEBRUARY) 03, 2022

Kechi atema election-i aier ?

Tanü tensa asen lima ama ka nung election-i aitsüba ya kanga tasak, kechiyong sen dang sen maja endok nungang takok angutsüba mapa ka lir, anungji asenok asoshi election ya sen asayaba sentongang ka mesük. Ibayongji, nübortem asoshi tajung inyaksü shisatsü aser temetetba liaka rongsen mekara election nung tokteptsübijibo otsü maka. Iba timtem jagi tanü lanurtem aika sempet aser tejangraba liaka yimten nung ozüng yanglur yimsüsür mekümtetter. Ano külen sen agi vote alia election nung toktepba agi, madokertemjibo yutsür tadokertema nübortem asoshi bilemtsü melen election nung atsüba sentsü indang bilemdang, küm pongo nung pei constituency nung kecha terenlok inyakba tsüngsüa medoktsütet anogotem süitemdaksür. Ibaji yimsüsür asoshi dang masü saka nübortem asoshia kanga takoksa aser tesasatsü mapa ka lir. Aji oda, asen lima nungbo election ya pei lima yimten otsü aser terenlok mapa inyaksüba onüktem jembiba mapang masü saka sen asayaba mapangang ka asünungji, asenoki repranga lia sen agi election nung asayartem aika sentsüsür akümba angur. Tangar asoshi election ya pei lima aser pei nübortem libaliro jenjang tajungba yangluja takar kümdaktsütsü asoshi lenirtem shimba mapang tajung ka lir, ajisüaka asenok asoshi election ya takar agi sentsüsür akümba aser nübortem libaliro jenjang tamajungba küma aoba mapang lir. Ibayongji, election agi shia Naga nunger takar noklang dak tali sentsüsür akümer aser nübortem jenjang tamajungbai aier. Item takartem agi sentsüsür akümba purtem rongnungji, ashiko, asenok Aoertemang teimba asütsüa akok. Shitakba agibo election ka agili asen lima nung lanurtem asoshi mapa inyaker meinyakma adokli, election ka agili mozü aser school kitem tuluba aser tajungba kümli, election ka agili light tajungba aruli, tzü teperiba nguli aser gari lenmang tajungba kümli ta meteteteta asen lima topur junga akümtsüla aser nübortema pei taküm aser kibong agi nümadangteta alitsüsa senotsü aadak akatsüla. Ajisüaka, asen lima nung election agiba yabo ochiba election masü, ya tiyazü, anungji asenok ajak tiyazü lima nung alir. Item tensa tia indang bilemdang dang, election aier tema kechi atema election aier ta bilemer. Iba ama yimten angatetba nung election agia yimsüsür shimer masü saka sen asayaba sentong ka dang amato kümdakja election agiba inyakyim ya lanurtemi anendaktsütsüla. Aji oda, tanü Naga lanurtem aser talisa Aoer lanurtem asoshi ochiba election mapang ka tenzüksü asoshi takotsüngdok (revolution) mapang ka tenzüksü asen lima tensa mapang agi akanger. Iba amai sen agi vote alia election agiba nung tanü lanurtem asoshi kechi teimla lir ? Joko, lanurtemi election mapang sen agi vote alitepba mapatem menokdangtetba agi, yashi tashibo election mapang sen aser yi dang amshia liasü saka tanübo drugs dena amshir. Iba jagi election ajanga lanurtem nem teimla tasen bener arutsütsü melen, tanü election nung drugs amshiba agi election temer külena drugs metoktsütet lanurtem taküm aika raksadagi. Asen limabo yamaisa aotsü na ? Tang election nung sen, yi aser drugs amshiba yagi asen limai temelenshi tajung bener arutsü na ? Asenok election aiertemia asen dang adokra ojang ta ser nübortem vote sen agi alitsü aser election temer asen nübortemji nisunga masü amai amshitsü na ? Aji oda, asen election nung dang adokra ojang ta aser lanurtem nem yi jemdaktsütsü na aser lanurtem nem drugs agütsütsü na ? Iba ama tasa amshia election-i aiba agi asen taküm aser kibong azükarutsü na ? Item election-i aiertemi kanga junga bilemdangtsü junger. Election-i aiba ya adoker asü madoker ta asübaji tongtibang masü saka lanur kwika nembo mapa inyaksüsa maongka agütsütetter ? Nübortem sen meindoki pei alidak taneptsü aser kaketshisatsü tajung ngutetter asü mengutetter ? Asen lima nung akaba ali rongsentem tagitsü küma amshiteter asü mamshiteter ? ta asüba onük aser khurettem mapa küma inyaksübaji tongtibang lir. Atangji, asenok ket nung sen aika alitsüa akok, saka sen agi sen melentsü tebilemba nung election-i aiba ajanga asen lima aser nübortem sensaker kümdaktsütsüasabo yimten nung shilem magili. Joko, ken aser sangro mejemertemia asen lima ochiba dangi shilangdagi ta mejema atentsüsa, asenokbo sen amshia masü ochi jembia election agitsü merangdi.

OLEMSABANG

AJUNGMESOR

~ T. Lima Tzüwar, Ungma Aonglenden, Artang Ward.

Temeim Khristan tajungtem iba lima rangben nung Tsüngrem aser Yisu dak amanger nütsüng nübur kwika lir, item ajakji taküm Tsüngrem amangertem lir aser asen kodang iba temenen lima toktsür kodang odir oaka asen tanüla kotaki atuba amangertem lir. saka anü külemer ita külemer, nashi külemer aser teyangluba süngyalu külemer item kin ajakji sür külen mi nung arongtsüba nüburtem lir aser asen Khristan lima ya par kapu nung ayutsü meranger. Taoba küm July aser August meta paper nung tamangba yimsü atema shingaija tejembi ta ashiba tu paper azüngertemi ngua alitsü. Parnoki India lima ajak ya tamang yimsü ka asütsü meranger asünung küm pai kati Naga nüjiso asoshi jembia arur saka tanü tashi kecha mekümteter, ya asen Naga nungertemi kanga tang junga bilemdangtsüla. Election ka aru shia Naga yimten ken o kechi südir süaka Election temer inyaksütsü ta mesüzüka arur, yamaji Nagaland Government-ia ashir. Saka Election temerbo amadoker, yamaji asen Naga nunger nem waku agütsütsübo toker asen Naga nunger temzünga magütsünür par temzüng küboksa asen Naga nungertem lidaktsüner, anungji asen Naga nunger amenba rong tzü telongi meitaktsütsüsa asen Nagaland nung aliba arogotemia Election nung shilem akitsü merangtsüla. Arogo NNP aser RPP tepong ka langer constituencies ajak nungi toktep nungbo kanga ajungtsü. Temeim asen Nagaland nung aliba Khristan tajungtem asenok kati ka arishitepa tai putepa tenük meremtepba mekazüi asen Naga lima ajungtsü asoshi inyakdi arungma. Asenoki Election aginüyonga maginüyonga India temzüng kübok alir asünung Election agitsü joko mapang tongogo, anungji sen agi masü saka asen Naga lima renloktsü asoshi nisung shimdi arungma. Senbo tanü meshitsü aser tanü tematoktsü aji asünung asen Nagalandji Khristan lima ta angateta aser taküm Tsüngrem angateta nisung shimdi arungma. Asüküm, tenük merem, mokokachi, arishitep agi masü, saka asen Nagalandji Khristan lima ta angateta ochishir aser Naga lima meimer aser nübur meimba nisung shimdi arungma. Tejenba ken No. 115 nung yamai shia angutsü: Taküm lisüji ondokang.

1. Tzüsem nung taküm lisü ontakjang yangji tekümzüksü nisung ka lir
Adianu kari shibai najami
Pa dak taküm lisüji ontaktsütsü

Lep: Taküm lisüji ontokjang
Nisung kar ponger otar
Taküm lisüji taküm lisü tzü nung ontakjang
Tanü kar samataki

2. Yakta taküm lisüji ontakjang
Kechiba na atapisa menur
Ajiang pa samar tang yakta suang
Tekümzüksü rong ka lir tangsa oangma
3. Lendong nung alisang kümzükanag
Timtemseta telongi ludaki
Tali mapang jashi tzüsemi tatem mangtak
Tzü nung ontaktsütsü
4. kümzüksü mapang yakta süitemtsü
Tatem makatak yakta samatsü
Suang kü tempa joko mapang mali
Parnok kümzüksü taküm lisü yoking

O asen Aotsür aser Aor aser nütsüng nübur aser amangbapur temulungjang nung koba tashi bilema kazütar, ken kanga junga shisatangtsüla. Asen Ao lima kija nung constituency 10 nung Minister karbo adokdaktsütsüla masü no. Asen Ao kinbo tangar sülen tang anitaktsüba no? Asen Mokokchung district kechi jenjang nung lir bilemdangang. Tenük merem, ngasangatem mokokachi, arishitepa, tai putepa kazütepa agibo asen Ao kin kodanga merenloktsü ati. Tangar asen Ao kin yimya awashi aser jakla ngur parnokbo pei temulungjang melenshir Minister menden tulu nung amentsü meranger, saka asen Ao kinbo tangar dang nungi angati sen meshia semer asüküma aser ngasangatema alitsü tang bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Bible in a Year' Podcast million 10 ben dak tali download süogo

February 02, 2023: Pray.com indang 'Bible in a Year with Jack Graham' million 10 ben dak tali download süogo; iHeart Podcast aser healthcare sharing community Medishare senteper yaküm October ita nung Bible in a Year with Jack Graham podcast ya tenzüka liasü.

"Nüburtemi Tsüngrem O metettsü aser tamang jenjang aintsü atema Pray.com ya hadir ka ama amshitetba atema Tsüngrem nem tenüngsang agütsür," ta Pray.com tenzüksang aser CEO, Steve Gatena-i sangdong ka ajanga metetdaksü.

"Iba project takok angutsü atema kanga meranga inyakba asoshi onoki Pastor Jack Graham dang pelar; iba dak alia podcast tajung adoktetba atema iHeart aser Pray.com

teams nem tenüngsang agütsür," ta paisa metetdaksü.

Jack Graham ya Texas nung aliba Prestonwood Baptist Arogo nung pastor inyaker. Iba Arogo nung züngsem 56,000 dak tema lir. Pai kaket aika züluogo. Pa tamalen National Day of Prayer nung Chairman aser Southern Baptist Convention nung Tir inyaka liasü.

"Onoki mezüng iba podcast tenzüka mapang nung ni kechi imlatsüar memeteti liasü, ajisüaka Tsüngremi mapa inyakba ngua süngmanger. Iba podcast ajanga nisung million aika kongshir," ta pastor Jack Graham-i metetdaksü.

"Iba ya cinema mesüka yangluba ajanga azüngtsü mejangrartermia iba podcast angatsü/reprangtsü yimya sübaa kümogo. Iba project atema meranga inyakba asoshi

ni Pray.com dang pelar aser BibleinaYear.com ajanga ano nisung million aika taküm nung kongshitsü sarasadema atar," ta paisa shisem.

"Bible in a Year with Jack Graham" sayaba sülen mezüngbuba hopta nungsa Spotify religion list nung iba podcast-i mezüngbuba jenjang tongteta liasü.

Pray.com content vice president, Max Bard-i, "'Bible in a Year with Jack Graham' podcast kanga takok anguba ajanga onok pelar. Südoksünemba den külemi otsü ashiba format ya ajanga maneni anogo shia Lai O angartem yaria ajungmesotsü ta onoki imlar. Nisung aikati Tsüngrem O nung tera yanga litettsü aser anogo shia Lai azüngba ajanga tepela angutsü atema onoki maneni inyaksü," ta metetdaksü.

Tesüiba küm 10 tsüngda tetsür million aikati Arogo toktsüogo

February 02, 2023: Tesüiba küm 10 tsüngda tetsür million aikati Arogo toktsüogo, ta kaketzülur aser journalist, Ericka Andersen-i metetdaksü.

Tawa lai züluba kaket 'Reason to Return: Why Women Need the Church and the Church Needs Women' kaket sayaa liasü aser iba kaket nungji lai, tetsüiba küm 10 tsüngda tetsür million 16-i Tenla kidangi aoba anenogo, ta shia lir.

Interview ka nung jembidang lai, "Ni kanga amshinüba oren kaji- 'tesüiba mapang na adenba Arogoji tarutsü atema na adenba Arogo asütsü mentüngdak'" ta ashi.

Arogotemji ka danga tetemsü mali, ajisüaka tetsürtemi tanaben Tenla kidangi aotsü aser tepela den atangji nükjidong jangjatsüla, ta lai ayongzük.

"Tetsürtemi Arogo toktsüba data kar ni nguogo aser iba denji medemdangra tesüiba küm 10 tsüngda Arogo toktsür teburtem

dang nungibo tetsürtem teimba. Item tetsürtem aika Tsüngrem dang nungi mepilar saka Arogoi parnok tanaben jaoktsü nüngdak," ta lai ashi.

2019 küm Pew Research-i agiba study ka ajanga bushitetba agi, tesüiba küm 10 tsüngda tetsürtem tanela nung tashi meiti kümogo aser 'ni Khristan' ta ashir tetsür shilem 80 aliba nungi shilem 69 dang kümogo. Iba dak alia 2009 küm nungi tenzüka 'tamangba yimsü kecha mamanger' ta ashir shilem 10 agi tali kümogo.

#ChurchToo movement mapang nung tetsür aikati Arogo tokja liasü; iba movement mapang nung Arogo nung shi jangraba tsütsü aibelenba ken o aika jungkai adoka liasü.

"Tang tashi nungbo tetsürtemi Arogo toktsüba kulitem rongnung tongtiji nüktpangtaba ajanga lir," ta tawa Relevant Magazine nung ocet ka ajanga metetdakja liasü.

Tetsür aikati Arogo toktsüba

dak sendakba onük nung o lemtepa mapang Anderson-i, "Tetsürtemi Arogo toktsüba kulitem rongnung kanga anibelemba, mazüngi aliba mesüra yimsü meyipba asütsüa akok. Ajisüaka Arogo toktsür aikati tanga yimsü magizüker saka maneni Tsüngrem denbo tesendaktep ayur," ta ashi.

"Item ama tetsürtem aikati len sayurtem bushir aser parnok metaloktsü atema medemer bushir," ta lai ashi.

"Na aser ner kibong atema tajangzük balala angur; item rongnung mental health tajungba akümba, tesendaktep tajungba akümba aser temang tajungba akümba densema lir. Tamang jenjang junga lira ner chirnurtem ainba mapang parnok tejakleni aotsü, tetsübu malitsü aser kecha marendaktsü; iba dak alia parnok tainlonglong akümdang pei sasa pei dak melung lemtettsü," ta laisa metetdaksü.

ANOGO ABEN TSÜNGREM DEN

Tsüngrem Shidak Angatetba

"Tang Ne lemantem kü dang sayuangma"

- Anitet 33: 13.

"Mosa, shiba den Kibuba tejak o tejak na shiyutep"

- Tazü. 34:12.

Maneni tesüngjem nung anogo shia miim sarasadem jagi taküm jenjang dang angatetdaksü masü; iba yagi Tsüngrem angatetba tejangja melenshitsür. Yimya nungi asenoki Tsüngrem indang kar angazüksü akok; aser kar otsü nungi angazüksü akok; aser iba dangi tali asenoki Laishiba aser Kibuba Yisu ajanga Pasasa jungkai adokba nungi tali angazüksü akok. Item tatalokba ajakji tezülen nungi Tsüngrem nungi jungkai adokbatem lir. Tsüngrem nungi item jungkai adokbatem mangu dang tama asenok taküm nung tatalokba kar alitsü tenüngdaksü- tanela mangdang akatsüla.

Chichiba Khrista dangi meyiper shia dak Tanela Temeshi-i tanela yimya tasen, tanela nung angutsü, angashi aser angatettsü agütsür. Ajisüaka, iba yimya tasenji Tanela Temeshii angatetdaksütsü nüngdak. Paul mulungjang nung aji yur Efesa 1:17,18,19 nung aliba sarasademji agütsü, "Aser asen Kibuba Yisu khristar Tsüngrem, sentsüwangshi Tebui pa indang metetba nung shisatsü aser jungkai adokba tanelaji nenok nem agütsütsü ta ni sarasademer..." Tanelai agütsüba iba tesangwa tangatetba nungi pilar, alimaji temangmangtsü ka dang akümer, Laishibaji zülu tasü ka dang akümer, Khrista tebur tajung süngyanglu ka dang akümer.

Kodang asenoki sarasadem tenemi tudir idangji Tanelai asenok nem tangatetba tanela agütsür. Sarasadem tenemji sendokra yimya tasen jagia Tsüngrem ajungabo mangatettsü aser telemok mela nung dang alitsüsa asütsü.

Asenok Tsüngrem angatetba mesensatsüba putu ka nung alir. Alima nung alir asü nung aiben asenok alima yimya mapa agi shisabuludaktsür, tekülak mapa agi Yisu atalaba mapa nung takok angur ama sayudang aser million aika timtema angudang Tsüngrem angateta aliba mesensaa asenoksasa timtem bendenloker.

Saka iba ama teraksa jagi shirnok sentsü melenba tenemi tua Kotak den miim telungjem akar parnok dak mekongshir. Parnoki Pauli ashiba o bilemtetter, "Shiba tanela nisung lir pai tanela mapatem angatetter." Tsüngremi alima nung Pa dena aliba aser otsü nung Pa nükjidong aser o nung Pa miim mapa jungkai adoktsür ta tanela nisungji angatetter.

Sarasadem tenem kolak nung Tsüngrem alima ajunga lir, otsü ajunga lir aser asenok dak atalokba ajak lir ta angur.

'The Chosen' reprangba ajanga nisung aikati Lai O atema tzüar

February 02, 2023: 'The Chosen' film yanglur executive kati, The Chosen series reprangba ajanga nisung aika Laishiba zünga Tsüngrem O metettsü atema tzüar aser Khristan den tesendaktep tajungba akümer, ta ashi.

The Chosen content vice president, Katherine Warnock-i, iba series ya Laishiba melen adokba masü, ajisüaka iba series reprangertem Laishiba dangi tanaben anitsü atema lir, ta ashi.

The Chosen series tasembuba alima tesem ajungalen million 400 dak tali stream süogo aser The Chosen Season 3 Finale film February 2-6 anogotem nung sayatsü.

Warnock-i, "Tatemsabo nüburtem chichiba Khrista dangi anitsü aser Laishiba dangi ania Tsüngrem O atangji metetdaksütsü nükjidong nung onoki inyaker. Itemji onok nükjidong, ta ashitsü onoki kecha maaker," ta metetdaksü.

"Onok dang 'The Chosen' film reprangba ajanga onoki Laishiba nung ano tanga otsü

balala azüngtsü jangrar', ta anogo shia nisung aikati onok dang ashir. 'Ni Laishiba aser Tsüngrem O atema tzüar' ta aikati onoki dang ashir. Item ama süngjang aika atangba onoki angur," ta laisa metetdaksü.

"Onoki iba series ajanga Laishiba melentsür masü saka iba ya ajanga nüburtem Tsüngrem O dangi anitsü meranger," ta lai ashi.

The series nung otsütemji yimsü tsütsü shisashir mongin aseme akümba luden kati jungjunga reprangshiba sülen ang film tangok tenzüker, ta lai ashi.

"Onok atema Evangelical shisashir ka, Messianic tesayur ka aser Catholic putir ka lir. Par asem longjemer film otsü tezülubaji jungjunga reprangshir. Parnoki [director] Dallas Jenkins aser otsü zülur ana den jembia o lemteper. Anungji film otsü nung oren shiaji Laishiba tsütsü shisashir mongintem jagi jungjunga reprangshiba sülen ang film tangok tenzüker," ta lai metetdaksü.



Museum of the Bible indang exhibition tasenba, 'Scripture and Science: Our Universe, Ourselves, Our Place' semzükba anogo nung tangokba noksa nung angur. Washington D.C, January 19, 2023.

AO OSHI ANGAZÜKDAK: TANÜ ANGAZÜKTSÜBA OJANG



Osaolem

(v) yimbazümalem (insincere)

* **Osaolem** nisung dak temulung alemtsü mali.

Osaosar

(adv) rabalen, temulung magütsü (heartless)

*Tanü asüng lanurtem aika **osaosar** senzüa lia angur.

OLONG PAITEP # 6417

1		2		3		4	5			
				6						7
		8								
9				10		11				
			12						13	
						14				
16									17	

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenuk telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6416 TELANGZÜBA


TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among, 12. Miim,
- 13. Anem.

Agüja aliba noksa nung meputepi aliba 7 bushiang



Meghalaya assembly elections 2023: BJP menden 60 prongla nung tokteptsü



Shillong, Tsüklai/February 2 (Agencies): Meghalaya nung Bharatiya Janata Party (BJP)-i Brehostibarnü taruba state assembly election atema candidate tem tenüng sangdongogo.

Iba ita agitsü aliba state assembly election atema Meghalaya BJP-i, constituency 60 prongla atema candidate tem shimogo.

Meghalaya assembly elections atema candidate tem list sangdongba mapang BJP national secretary Rituraj Sinha-i, par party pur election nung "Empower Meghalaya" omen nung ajemdaker tokteptsü, ta ashi.

"Nüburtem tejangraba temulungdang yur tang mezüngbuba onok lenirtemi Meghalaya nung menden 60 prongla nung tokteptsü atema telemtetba agiogo. Onok indang omenji Empower Meghalaya asütsü," ta Sinha-i ashi.

"Meghalaya nung küm aika yimden yimsüsüba ya Congress-i amokbanger aruogo, aser taoba küm tem tsüngda Northeast aser linük nung state balala den medemdangra Meghalaya nung terenlok kangabo mangur," ta Sinha-i ashi.

"State nung ochi mashi inyakyim aser terenlok kanga meyilongi aoba ajanga Meghalaya nung aliba nüburtem laktetogo. Tanga Meghalaya nung yimdak yimtsüngtem nung tesendaktep maju aser iba den power agi timtemer aser health facility tema majung," ta pai ashi.

"State nung central schemes tem benoka inyaksangshi masür. PM Modi-i ochi mashi inyakyimtem raktoktettsü aser terenlok takaratiba nung bener arutsütetsü, ta tamang akar," ta paisa shisem.

New Delhi nung candidates' list sangdongba mapang osangbenertem den sensaksem dang Meghalaya BJP tir Ernest

Mawrie-i, "Khasi-Jaintia aser Garo Hills tesemtem nung party-i menden telongjunga akoktsü nükjidong lir," ta ashi.

2018 küm Meghalaya assembly elections nung BJP-i menden 47 atema candidate yok ajisüaka ana dang koka liasü.

Candidate tem rongnung Highlander Kharmalki (Mawryngkneng), AL Hek (Pynthorumkhrach), Wankitbok Pohshna (East Shillong), Mariahom Kharkrang (North Shillong), Sanbor Shullai (South Shillong), Ernest Mawrie (West Shillong), David Kharsati (Nongthymmai), HM Shangpliang (Mawsynram), MM Danggo (Ranikor), Benedic R Marak (Raksamgre), Ferlin Sangma (Selsella), Adamkid M Samgma (North Tura), Bernard Marak (South Tura), Dipul R. Marak (Rangsakona) aser Samuel Sangma (Baghmara) nunger densema lir.

Tipra Motha-i assembly election atema crowdfund amenoktsü

Agratala, Tsüklai/February 2 (Agencies): Pradyot Kishore Debbarmen-i sangdong ka ajanga par party, Tipra Motha-i taruba Tripura Assembly elections atema nüboyimtsü asoshi crowdfunding campaign ka amenoktsü.

Par party pur taruba election nung menden 60 nungi 42 nung tokteptsü aser parnok "kingmaker" akümtsü nükjidong lir.

Debbarmen-i ashiba agi, par party ya BJP, Congress, aser

CPI(M) ama shishilembar takartem nungi teyari kecha mangur, anungji Tipra Motha-i national party kecha dena melongjemi election atema nüboyimtsü asoshi nüburtem dang nungi tenla meshir.

Iba inyakyim atema nüburtemi tenla agütsütsü asoshi party-i bank account ka lapokogo. Debbarmen-isa, ochishia inyaksü atema party bendanga agütsür lir aser nüburtem dang parnok election atema kechi nungi senotsü

teyari angur aji sayuner, ta ashi.

Election nung takok angutsü atema merandangba mapang pai nüburtem dang party pusemstü aser tenla agütsütsü asoshi mepeshia metetdaksüogo. Paisa, Tipra Motha party-i tangar teyari kecha magi-i Tripura nunger temejai nüboyimba sentong balala ayongzüka agitsü imlar, ta ashi.

Tripura nung state assembly election February 16 nü agitsü aser result March 2 nü sangdongtsü.

Arunachal: Tesayurtemi state board tatidang nung shilem magitsü

Itanagar, Tsüklai/February 2 (Agencies): Tesayurtem takhangba mapang talangka mataloktsüba sülen Arunachal Pradesh nung sorkar school nung tesayurtemi taruba state board tatidang nung shilem magitsü aser nüngdak dang süra CBSE tatidang nunga shilem magitsü telemtetba agiogo.

State board tatidang ya February 3 nü tenzüksü lateta lir.

Arunachal Teachers' Association (ATA) kübok longkak aita aliba tesayurtemi state nung aliba kaketshir lokti tentetem dang parnok

pusemstü mepeshia metetdaksüogo.

ATA-i, school tesayurtem earned leave anogo 10 aliba nungi 20 kümtsütsü, retirement küm 62 kümtsütsü aser school infrastructure aser tesayurtem aliba kitem tangsa tang tanglushitsütsü khanga arudar.

Parnokisa block level tashi directorate of elementary aser secondary education lemdangtsütsü, taküm küm tashi nungbo jenjang ajak nung tesayurtem recruitment rules takaratiba nung yanglushitsütsü aser iba ya mataloktsü tashi district adult education officer, assistant

project officer aser block education officer temmeshitsü takhangba agütsüogo, ta central executive committee tir Kipa Kechak-i osangbenertem dang ashi.

"Onoki tenüngdakba takhangbatem agüjaka state sorkari haut a mali. Onoki February 3 nü nungi tenzüksü aliba state board tatidang nung shilem magitsü. Nüngdak dang süra onok CBSE tatidang nunga shilem magitsü," ta Kechak-i ashi.

ATA secretary general Jummar Kena-i ashiba agi, 1970s nung yangluba school tem jenjang kanga mejungi lir.

"NISUNG KATI PEI TEMBARTEM ASOSHI PEI TAKUM AGÜTSÜBA DANG NUNGI TULUBA TEMEIMJI SHINGA DAKA MELIKA" Yohan 15:13

ASO : 09.05.1942 - ASÜ : 18.01.2023

Onoki teti meima aliba walunir **Asür Watinungsang Pongener**, Ex-Chairman (Kosasanger Putu) aser Head G.B, Chuchuyimlang village, iba lima nungi pila aoba mapang onok asoshi sarasademja, temeim sayua yariteper ajak dang kinunger tenüng nung pelaba lemsateper.

Nenoki temeim sayuba onok molung aser sarasadem nung teti alitsü.

Item dang alaketa pelaba lemsateper:

1. Chuchuyimlang Rionsanger Putu
2. Kosasanger Putu, Chuchuyimlang
3. Chuchuyimlang G.B Telongjem
4. Kosasanger 3 Buba Sungpo Zunga, Chuchuyimlang
5. Imlang Mopu, Chuchuyimlang
6. Teyong Mopu, Chuchuyimlang
7. Imkonglemba Aso, Chuchuyimlang
8. Imkonglemba Asotsür, Dimapur
9. Shri Tongpang Ozukum, Minister PWD (Housing& Mechanical)
10. Shri Amen Yaden, Hon'ble MLA
11. Nuklutoshi (Ex.MLA)
12. Ao Student's Union, Guwahati
13. Longsa Tekka Pongen Kidong
14. Ungma Impang Pongener Kidong
15. Yachem Village Council
16. Yaongyimchen Village Council
17. Longsing Village Council
18. Longra Village Council
19. Yaongyimti Village Council
20. Salulemang Village Council
21. Mongsenyimti Village Council
22. Chuchuyimlang Town Baptist Arogo
23. Chuchuyimlang Baptist Arogo

Temeim kinungtsü, chirnur, semchir aser kinungertem.



MENUNGRA BILEMTETER

Asür Takomoa (Mopungchuket) 03.02.2022

Akümlü wadang tembanger küm ka süitemaka nü temeim aser mapa tajungtem onok molungjang nung teti na menungra bilemteta sarasadema amonger.

Temeim Kinungtsü, Chirnur, Kinungertem.



Menungra Bilemteter

1st Death Anniversary

3rd February 2023



Asür Toshiwapang

Temeim oba,
Nü tejak tesangwa onok nuklai teti arur.
Nai onok toktsür orr küm ka abensaa aruaka,
na onok den alia ma bilema onok mulung nung na teti lir.
- Kinungtsü jala, jabaso aser kinungertem.

VACANCY ANNOUNCEMENT

**NUWAKOT GLORY SECONDARY ENGLISH BOARDING SCHOOL
Suryagadhi -5 Phedibeshi Nuwakot , Nepal**

We are looking for

Talented, hardworking, qualified and dedicated teachers for our glorious institution in secondary level.

Basic job information : - Job category : Full time Teacher
- Level : Secondary
- No of vacancy/s : 4

Principal - 1 with master degree in any stream

Maths teacher - 1 English teacher - 1 Account teacher-1 Qualification : Minimum Bachelor (as major subject)

Job location : Suryagadhi - 5 phedibeshi Nuwakot, Nepal

❖ Offered salary : Principal - Rs.31,250/-
For Assistant teachers : Rs.18,750/- with free Lodging facilities (Extra class extra pay)

❖ Apply immediately

❖ Job experience required : Minimum 2 years teaching experience.

**For Contact : Mobile 9841512236 Viber / WhatsApp
Email: adhikaripuru4@gmail.com**

Russia-i ano February 24 nü amaktsü sentong yanglur: Oleksii Reznikov

Kyiv, Tsüklai/February 02 (Agencies): Russia-i ano kanga sashia amaktsü renemshir aser aji February 24 nung tenzüktü akok, ta Ukraine indang defence minister-i ashi.

Oleksii Reznikov-i ashiba agi, Moscow-i sepai meyirijang aika anidena lir aser taoba küm rara tenzüka anogo tenüng nung langka kar merangtsü akok.

Iba ya February 23 nü Russia indang Defender of the Fatherland Day temaitsü asütsü akok, kong sepaitem toshia amunger.

Ano Kramatorsk yimti nung amakdang nisung asem süogo.

Donetsk region nung nisung aliba ki ka nung Russia nung missile ka khalokja yangji nisung

ti yiru, ta provincial governor-i ashi. Asürtem ya timba akumtsü akok, kechiaser tekumzüker temi ki raksar aliba kakkoba reprangba mapang lir.

"Russia nung kiralongraba anendaktsütsü lenmang ajak agi parnok madak takok angutsüba ya lir. Tanks, fighter jets, long-range missile tem amshia," ta Ukraine Tir Volodymyr Zelensky-i iba lendong indang social media nung zülutsü.

Germany, US aser UK linük temi tank yoktsü molungba sülen ano tayimtsü amshia amakba nungi parnok kumzüka alitsü asoshi Ukraine-i fighter jets meshiba tawa asendenshir.

Reznikov-i ashiba agi, Moscow-i sepai 500,000 shi anidena lir.

September ita Russia Tir Vladimir Putin-i sepai atema tenüng zülutena aliba nisung 300,000 shi anioxtsü sangdonga liasü aser ibai linük indang litsülika lungjemtsü asoshi nungdakba ka lir, ta pai ashi.

Ajisüaka shimoka Ukraine leni yokba sepaitem ya kanga agi timba alitsü, ta Reznikov-i ashi.

Russia-i tawa Donbas region anüdoklen tesem kar rakzükogo ta ashi aser par sepaitemi parnok Bakhmut nung tongpang lenir aor, ta ashir.

Taoba ita Russian mercenaries aser sepaitemi Soledar jila rakzük aser Russia-i shimba ketdangsür Yan Gagini Bakhmut ya tesem ajaklen nungi meketbanga lir, ta Bodhbarnü shia liasü.

Iran nungi Yemen leni nok-nü bener aoba rong ka apu

Washington, Tsüklai/February 02 (Agencies): France indang tziyüm sepaitemi January ita assault rifles, machineguns aser anti-tank missiles aika apu, koba Iran nungi Yemen lenir aorba liasü, ta Wall Street Journal aser The Associated Press news agency dang ketdangsür temi ashi.

Tang tashi Iran-i item hadir apuba nangzüka mali, saka United States military indang Central Command ajanga prokshiba noksa nung Houthi telungpur asoshi yokba nok-nü nguogo, koba Tehran den sendaktepa aliba danga rong tem nung American sepaitemi apuba den mesüktepa lir.

US-i Bodhbarnü sangdong nung koba teloki apuar jangja mashi saka 'partner naval forces' temi apuba nung yaritepa liasü, ta dang ashi.

Ukraine den raraba mapang Russia nem drones agütsüba mechi anüolen linük temi Iran aitsüba aser longkak aiter anema tashiyim amshia pua merenshiba mapang ka nung iba osang ya sangdonger.

Iran linük tiyonglen Isfahan yimti nung aliba military workshop ka nung Israel nung drone kati maker region nung tensa mejungi aliba tali tamajungba kumdaktsür.

Item hadir ya January 15 nü Gulf of Oman nung apu. Gulf of Oman ya tziü temang ka lir, koba Strait of Hormuz nungi Arabian Sea ajanga oa Indian Ocean nung yimoker.

Item hadir apuba tesem nungya akhi mapang nungi ozüing alema nok-nü shibeleneri

Iran nungi Yemen-i belenba nung amshir, ta US Central Command ajanga ashir.

United Nations pangziung ka ajanga Yemen nung Iran-i yariba Houthi telungpur nem nok-nü agütsüba nokdang. Houthi telungpur yagi 2014 küm Iran yimtiba agia liasü aser 2015 küm March ita nungi Saudi-i aniba coalition koba linük balalai agizükba sorkar busemer, item den rara arur.

Item nok-nü apuba osang ya Wall Street Journal ajanga mezüng sangdong aser yangji shilem agiba sepaitem ya elite French special forces ta ashi.

France mitkaria tang tashi iba atema telangzüba mesüra sangdong kecha agüja mali.

US Central Command nungia telangzüba kecha mali aser Iran mission to the UN nungia kecha shia mali. Abu Dhabi nung France indang tziyüm sepai lir, ajisüaka yimtenren tsütsü parnok Iran nunga lir.

Mapang talangka nungi Iran-i Houthi nung nem nok-nü magütsür ta tekong meranga arur, ajisüaka anüolen linüktem, UN nung takotet nisungtem aser dangar temi night-vision scopes, rifles aser missiles tem tsüingsü apuba Tehran tashi aor.

US Navy-i November ita sangdong ka nung ashiba agi, Iran nungi Yemen-i aroba rong ka nung ali temu agi missile fuel component ka miimbanga aliba nguteta liasü. Taoba mapang Houthi ballistic missile tem Saudi Arabia aser United Arab Emirates dak rangloker khalokja aru.

(Maneni tapak 8 nung...)

Frolic Cup: VFA FC, Falcon United & Amigos FC-i takok angu

Dimapur, Tsüklai/February 2 (TYO): Frolic Club-i ayongzüka Medziphema local ground nung tang asaya aliba Frolic Cup tanabuba anogo VFA FC, United Falcon Club aser Amigos FC-i pei tata asaya kokogo.

Anepdang mezüngbuba asaya VFA aser Libra FC na asaya goal 1-1 nung tembangba sülen tie break asayaba VFA-i koka liasü. Atakzükja aliba asaya mapang nung Libra nungi Sainem aser VFA nungi Aliba nati goal kaka idakja liasü. Penalty metsütepba sülen VFA-

i goal 5-4 agi asaya koka liasü. Brehostibarnü tanabuba asaya nung United Falcon Club-i own goal ka chir liaka asaya tanabuba shilem nung kanga junga asaya Ruzaphema Youth Org madak takok nguogo.

Iba asaya ya UFC-i goal 3-2 agi koka liasü. Asaya nung RYO atema Henry-i goal ana idaktsü aser UFC atema Kevisedede o Mangal Gurung (2goal) nati goal idakja liasü.

Tasembuba asaya defending Champion Amigos FC aser Patkai Christian College na

asaya, koba Amigos puri goal 3-1 agi koka liasü.

Asaya nung PCC atema Manton-i goal ka idaktsü aser Amigos atema Rhitso-i goal ana aser Menguzelie-i goal ka idakja liasü.

February 3 nü asaya vamai alitsü:

07:30 am : Dolphin fc Vs Sirhima FC

01:00 pm : Fury FC Vs Sechü Zubza Academy.

02:30 pm : Kuki Youth & Students Union Vs Ton Fc Molvom.

Zagreb Open: Aman Sehwat-i bronze medal angu

Tsüklai/February 2, 2023 (Agencies): Tanga asaya aliba Zagreb Open Ranking Series nung reigning Under-23 world champion freestyle wrestler Aman Sehwat-i tebur 57kg division nung bronze medal nguogo.

Bodhbar aonung bronze medal atema asayaba mapang Aman-i USA nung asayar Zane Richards 10-4 agi koka, Zagreb Open nung India atema mezüngbuba medal koktetogo.

Asaya mezüngbuba shilem tembangba tashi nung asayar anapronglai point pezüzü ngur liasü. Iba sülen asaya tanabuba shilem nung India nung

asayar yagi Richards amokbanger asaya aser point trok atonga ngua asaya koka liasü.

Qualifications asaya nung Aman-i China nung asayar Liu Minghu 8-2 agi koka liasü aser iba sülen quarterfinals nung 11-8 agi takok angu, ajisüaka semifinal asaya nung pa Japan nung U20 world champion Yuto Nishiuchi-i 5-15 agi koka liasü.

Tanga asaya ka nung Vishal Kaliramana, tebur 70kg division bronze medal asaya nung shilem agi, ajisüaka pa Azerbaijan nung asayar Khadzhimurad Gadzhiev-i

technical superiority (10-0) agi koka liasü.

Qualification round nung Kaliramana-i USA nung asayar Alec William Pantaleo makok, ajisüaka America nung asayar ya final-i tuba ajanga India nung asayar ya repechage round-i ai. Iba round nung pai China nung asayar Agudamu koka bronze medal atema asayatsü maongka ngua liasü.

Kasa mapang nung tebur 61kg division nung Turkey nung asayar Emrah Ormanoglu-i 5-2 agi Pankaj Malik tsükdaktsü aser pa repechage round-a metongtet.

Raphael Varane International asaya nungi anener

Tsüklai/February 2, 2023 (Agencies): France nung defender Raphael Varane-i pa international football asaya nungi anenba sangdongogo.

Champions League pezüben tashi koker aliba asayar yagi Instagram ajanga pa asaya nungi anenba osang lemsatepa liasü. Küm 10 tashi linük tenung nungi asayaba mapang pai 2018 küm World Cup kokogo aser küm pezü sülen taoba küm runners-up liasü.

Arishi küm 29 tain asayar, shiba 2013 küm mezüngbuba France team nungi asaya liasü pa France team nungi 93 ben asayaogo aser 2020-21 season nung Didier Deschamps-i aniba team-i UEFA Nations League akokba nung teyari agüja liasü.

"Küm ter tashi linük tenung nungi asayatetba ya ni atema tetushi ulura," ta Varan-i ashi.

"Linük indang Blue jersey asembashia ni kanga nemadanga liasü aser asayashia akoktsü atema temulung ajak bendanga agüja asayaogo."

"Ni asaya nungi anentsü atema ita aika bilema aruogo aser international football asaya nungi anentsü atema tang ya mapang shitak ta bilema iba telemtetba agiogo," ta pai ashi.

Taoba küm Qatar nung France team World Cup anabuba atonga final tonga asayaba nung Manchester United defender yagi teyari tulu agütsüogo.

France team captain aser goalkeeper Hugo Lloris-i, pa arishi küm 36buba nung asaya nungi anentsü asoshi telemtetba agiba sangdongba sülen tang Varan-ia iba telemtetba agiogo.

Paisa, sempet tajung aketba lanurtem nem maongka

agütsütsü mapang tongogo, ta ashi.

"Raphael-i anogo ishika tejakdang kü dangi call süa pa international asaya nungi anentsü bilemba lemsatepa liasü. Pa kanga tesangra aser telemtetba magi tsüngda kanga junga bilemdangerang telemtetba agitsü pai meteta lir," ta France coach Deschamps-i ashi.

"Raphael-i France team nung pa mapang temogo ta bilemer. Nia pa ama kasa tia kati ai anungji ni pa tebilemba angateter aser pai telemtetba agiba akümtsübur.

"Lenmang pilaba mapang, pai ochi jembiba atema aser France team atema bendanga agüja inyakba atema pa nem tetushi agütsür. Taoba küm ter tashi Raphael-i ground nung aser kima nung tongtibang shilem agiogo," ta Deschamps-isa shisem.

Rehan Ahmed aser Tom Abell na England team nung züngoksem

Tsüklai/February 2, 2023 (Agencies): Somerset batter Tom Abell aser Leicestershire leg-spinner Rehan Ahmed na March ita Bangladesh den asayatsü aliba asayamung atema England team nung züngoksemogo.

Arishi küm 28 tain Abell tang tashi nung international jenjang nung ken danga asaya mali aser kasa mapang nung arishi küm 18 tain Ahmed-a tang mezüngbuba white-ball asayamung atema shimogo. Pa Test asaya nungbo December ita Pakistan den asayaba mapang asayatokogo.

Lancashire pace bowler Saqib Mahmood, teberem yiruba ajanga ita teku tashi masayaba sülen tang team nung züngoksemogo.

Kasa mapang nung opener Alex Hales, Pakistan Super League nung asayatsü aliba ajanga iba asayamung nung shilem magitetsü.

Abel aser Mahmood na tang Sri Lanka nung oa asayadar. Sri Lanka den ODI asaya asem ya Abell lenisüba nung asayatsü.

Mahmood, shiba test ana, ODI tenet aser T20 12 asayar lir pa taoba küm April ita teberem yiruba sülen tang tashi nung ken danga asaya mali.

Ahmed ya December ita England nung asayartem rongnungi test asayaba asayar tanobusang aküm. Iba test nung pai run 48 agütsür wicket 5 agia liasü.

England ODI squad: Jos Buttler (captain), Tom Abell, Rehan Ahmed, Moeen Ali, Jofra Archer, Sam Curran, Saqib Mahmood, Dawid Malan, Adil Rashid, Jason Roy, Phil Salt, Reece Topley, James Vince,

Chris Woakes, Mark Wood.

T20 Squad: Jos Buttler (captain), Tom Abell, Rehan Ahmed, Moeen Ali, Jofra Archer, Sam Curran, Ben Duckett, Will Jacks, Chris Jordan, Dawid Malan, Adil Rashid, Phil Salt, Reece Topley, Chris Woakes, Mark Wood.

England-i asayartem club balala nungi asayatsü tenangzüktepba yanglur aliba minprong masütsü atema sentongtem yangluogo aser Sam Billings, Liam Dawson, Richard Gleeson aser Tymal Mills nung PSL nung asayatsü.

England team March 1 nü nungi tenzüka Bangladesh den ODI asem aser T20 asem asayatsü. ODI asaya ya taküm India nung ODI World Cup asayatsü aliba atema renemshiba ka asütsü, koba October ita tenzüksü.

Batters Will Jacks aser Ben Duckett na New Zealand den test asaya ana asayaba sülen T20 team nung adentsü. Pace bowler Jofra Archer-a yiruba ajanga ita 17 tashi masayatetba sülen squad anaprongla nung züngoksemogo.

Asava mapanglem:

March

1: 1st ODI, Sher-e-Bangla National Stadium, Dhaka

3: 2nd ODI, Sher-e-Bangla National Stadium, Dhaka

6: 3rd ODI, Zahur Ahmed Chowdhury Stadium, Chattogram

9: 1st T20, Zahur Ahmed Chowdhury Stadium, Chattogram

12: 2nd T20, Sher-e-Bangla National Stadium, Dhaka

14: 3rd T20, Sher-e-Bangla National Stadium, Dhaka.

Iran nungi Yemen leni nok-nü... (Tapak 7 nungi...)

US Central Command Yemen nung rara ya ajanga Bodhbarnü tangokba noksa tem nung mejangjaba rong ka nung nok-nü tabu balala nguogo. Item nok-nü nungya China-i yangluba Type 56 rifles, Russia-i yangluba Molot AKS20Us aser PKM-pattern machineguns tem densema lir. Taoba mapanga Iran dak tonglokja aliba nok-nü apuba nung item ajak ya densema liasü.

Central Command ajanga ashiba agi, iba rong nungya rifles 3,000 dak tema aser injang 578,000 dak tema liasü. Noksa tem nungsa 23 container-launched anti-tank missiles tem densema liasü.

Yemen nung rara ya tamajungba kuma tangatetep kati maruteti akum aser alima nung humanitarian crises tamajungtiba adokdaktsü. Ajisüaka Saudi-i anir tayimtsü amshia amakba Yemen nung 2022 küm March ita tatemlen ceasefire ka yangluba sülen meliasü, ta Yemen Data Project ajanga ashir.

Iba ceasefire ya asendenshitsü merangaka October ita tembang. Iba yongji rara ano tenzüksütsü tsüboa liasü. Yemen nung rara mapang nisung 150,000 dak tema süogo aser item rongnung civilian 14,500 densema lir.



Commissioner & Secretary Kevileno, Chairman NBSE Asano Sekhose, PD Thavaseelan K. IAS aser School Education keddangsurtem den DYRS keddangsurtem aser IG Academy kaketshirtem February 1 nü sensaksem sentong tembangba sülen tangokba noksa nung angur.

BILEMDANGANG

"Kar atema tamakoktsüji na atemabo takoktsü asütsü akok."